

# **Itxas-ontzia**

Juana Ibarbourou  
Euskaratzailea: Igotz

Gandu narrasaren ertz auskor utsaletik  
Lo artean dei egin daustazun turuta  
Urleza barneko oler-dei bat eldu yata,  
Urez andiko zure abotsak emonik.

Nitzat daukazu ausaz, koralez egiñik,  
Azken-atsedenerako buruko guria,  
Ene saitsa ertztuko daun nakar zuria  
Ateraz onezkero meatz sakonetik.

Gaur, arpea barriztu dauan itxas-aurrez,  
Nik, iñoiz itxasoan ibil ez nazana,  
Ta egundo endaitzik eskuan artu ez,

Ezta be urrin-ugarte-bideetan arraunik,  
Erioren ontzia oar dot neugana  
Datorrela aiz-oialak zabal ditularik.